

## O DOKUMENTU

Bosna i Hercegovina ne smije ostati po strani globalizacijskih promjena među koje spada i stvaranje modernog informacionog društva baziranog na intenzivnom korištenju znanja i informacija, ali i informaciono-komunikacionih tehnologija (IKT) u svakodnevnom životu. Nadalje, procesi informatizacije i promjene ne smiju se odvijati stihijski, nego je potrebno – koristeći se iskustvom drugih država – te procese usmjeravati i razvijati.

U tom smislu je Vijeće ministara Bosne i Hercegovine pokrenulo pripremu politike i strategije razvoja informacionog društva u BiH kao ključnih strateških odrednica na osnovu kojih će BiH djelovati na razvoju informacionog društva.

Politika razvoja informacijskog društva Bosne i Hercegovine jeste okvirni i bazni dokument, na osnovu kojeg će se, u procesu razvoja i izgradnje informacionog društva, moći donositi zakoni, propisi i drugi akti, te odlučivati o smjerovima razvoja, akcionim planovima i prioritetima na nivou Bosne i Hercegovine i njenih entiteta.

Politika propisuje i pripremu strategija razvoja informacionog društva, po razvojnim područjima (IKT infrastruktura, IKT industrija, ePoslovanje, eObrazovanje, eZdravstvo, eUprava, pravna infrastruktura i informaciono društvo i održivi razvoj).

Ovaj dokument sadrži Strategiju razvoja informacionog društva u ovih pet razvojnih stubova:

- Pravna infrastruktura
- eObrazovanje
- eUprava
- IKT infrastruktura
- IKT industrija

Strategija se odnosi na period 2004 – 2010.

Naručilac dokumenta je Vijeće ministara Bosne i Hercegovine.

Dokument je pripremljen u suradnji sa Razvojnim programom Ujedinjenih nacija (UNDP) za Bosnu i Hercegovinu.

Strategija predstavlja konceptualizaciju potreba i opredjeljenja izraženih u Politici razvoja informacionog društva BiH, kao i načina da se ona ostvare. Dakle, namjena Strategije je da ponudi razumijevanje načina ostvarenja opredjeljenja definiranih u Politici razvoja informacionog društva BiH.

Konkretnije, za svaki od 5 razvojnih stubova, dokument daje:

- Osvrt na današnje stanje;
- Razvojnu viziju;
- Osnovne strateške smjernice za ostvarenje vizije;
- Specifikaciju konkretnih akcija koje treba poduzeti prema strateškim smjernicama;

U Prilogu ovog dokumenta je dat pregled aktivnosti Akcionog plana, a u zasebnom su dokumentu (Akcioni plan) detaljnije opisane specificirane akcije, uključujući i indikatore za praćenje napretka.